

四庫全書

史部

欽定四庫全書

文獻通考卷一百九十五

鄱陽馬端臨貴與著

經籍考二十二

史

雜史各門總

雜史

隋經籍志曰自秦廢去古文篇籍遺散漢初得戰國策蓋戰國遊士記其策謀其後陸賈作楚漢春秋以述誅鋤秦項之事又有越絕相承以為子貢所作後

漢趙曄又為吳越春秋其屬辭比事皆不與春秋史記漢書相似蓋率爾而作非史策之正也靈獻之世天下大亂史官失其常守博達之士愍其廢絕各記聞見以備遺亡是後羣才景慕作者甚衆又自後漢以來學者多抄撮舊史自為一書或起自人皇或斷之近代亦各其志而體制不經又有委巷之說迂怪妄誕真虛莫測然其大抵皆帝王之事通人君子必博采廣覽以酌其要故備而存之謂之雜史

宋三朝志曰雜史者正史編年之外別為一家體制
不純事多異聞言或過實然藉以質正疑謬補緝闕
遺後之為史者有以取資如司馬遷采戰國策楚漢
春秋不為無益也

隋志七十二部九百七十一卷

通計亡書七十三部九百三十九卷

唐志雜史八十八家一百七部一千八百二十八卷

失姓

名八家元行中以下不著錄
六十八家八百六十一卷

宋三朝志雜史九十一部九百六十八卷

宋兩朝志三十一部六百三十卷

宋四朝志二十四部一千七十三卷

內唐武宗實錄以下六部入實錄門

不重具

宋中興志別史三十一家三十六部一千三十四卷

右雜史

隋經籍志曰古之史官必廣其所記非獨人君之舉
周官外史掌四方之志則諸侯史記兼而有之春秋
傳曰虢仲虢叔王季之穆勲在王室藏於盟府臧紇

之叛季孫命太史召掌惡臣而盟之周官司寇凡大盟約泣其盟書登於天府太史內史司會六官皆受其貳而藏之是則王者誅賞具錄其事昭告神明百官史臣皆藏其書故自公卿諸侯至於羣士善惡之迹畢集史職而又閭胥之政凡聚衆庶書其敬敏任恤者族師每月書其孝弟睦婣有學者黨正歲書其德行道藝者而入之於鄉大夫鄉大夫三年大比考其德行道藝舉其賢者能者而獻其書王再拜受之

登於天府內史貳之是以窮居側陋之士言行必達
皆有史傳自史官曠絕其道廢壞漢初始有丹書之
約白馬之盟武帝從董仲舒之言始舉賢良文學天
下計書先上太史善惡之事靡不畢集司馬遷班固
撰而成之股肱輔弼之臣扶義倣儻之士皆有記錄
而操行高潔不涉於世者史記獨傳夷齊漢書但述
楊王孫之儔其餘皆略而不說又漢時阮倉作列仙
圖劉向典校經籍始作列仙列士列女之傳皆因其

志尚率爾而作不在正史後漢光武始詔南陽撰作
風俗故沛三輔有耆舊節士之序魯廬江有名德先
賢之贊郡國之書由是而作魏文帝又作列異以序
鬼神奇怪之事嵇康作高士傳以叙聖賢之風因其
事類相繼而作者甚衆名目轉廣而又雜以虛誕怪
妄之說推其本原蓋亦史官之末事也載筆之士刪
采其要焉魯沛三輔序贊並亡後之作者亦多零失
今取其見存部而類之謂之雜傳

宋三朝藝文志曰傳記之作蓋史筆之所不及者方聞之士得以紀述而為勸戒

隋志曰雜傳唐志曰雜傳類有先賢耆舊孝友忠節列藩良吏高逸科錄家傳文士僊靈高僧鬼神列女之別今總為傳記事涉道釋者各具於其事

宋兩朝藝文志曰傳記之作近世尤盛其為家者亦多可稱采獲削橐為史所傳然根據膚淺好尚偏駁滯泥一隅窻通方之用至孫冲胡訥收摭益細而通

之於小說

按雜史雜傳皆野史之流出於正史之外者蓋雜史紀志編年之屬也所紀者一代或一時之事雜傳者列傳之屬也所紀者一人之事然固有名為一人之事而實關係一代一時之事者又有參錯互見者前史多以雜史第四雜傳第八相去懸隔難以參照今以二類相附近庶便檢討云

隋志二百一十七部一千二百八十六卷

唐志一百二十五家一百四十六部一千六百五十六卷

宋三朝志一百三十九部四百三十七卷

宋兩朝志一十六部八十一卷

宋四朝志五十三部五百二十二卷

宋中興志三百一十三家三百三十九部一千三百七十九卷

右雜傳

隋經籍志曰自永嘉之亂皇綱失馭九州君長據有
中原者甚衆而當時臣子亦各記錄後魏克平諸國
據有嵩華始命司徒崔浩博采舊聞綴述國史諸國
記注盡集祕閣爾朱之亂並皆散亡今舉其見在謂
之霸史

隋志三十七部三百三十五卷

唐志一十七家二十七部五百四十二卷

宋三朝志二十七部三百七十二卷

宋兩朝志五部五十四卷

宋中興志四十家四十三部四百三十七卷

夾漈鄭氏曰古今編書所不能分者五一日傳記
二曰雜家三曰小說四曰雜史五曰故事凡此五
類之書足相紊亂又如文史與詩話亦能相濫編
書之家多是苟且有見名不見書者有看前不看
後者尉繚子兵書也班固以為諸子類實於雜家
此之謂見名不見書隋唐因之至崇文目始入兵

書類顏師古作刊謬正俗乃雜記經史惟第一篇
說論語而崇文目以為論語類此之謂看前不看
後應知崇文所釋不看全書多只看帙前數行率
意以釋之耳按刊謬正俗當入經解類

按夾漈言古今編書所不能分者五可以訂歷代
藝文志之失所謂見名不見書看前不看後者尤
足以究其所失之源然愚嘗考之經錄猶無此患
而莫謬亂於史蓋有實故事而以為雜史者實雜

史而以為小說者又有隋志以為故事唐志以為傳志宋志以為雜史者若一一考訂改而正之則既不欲以臆見改前史之舊文且所錄諸書蓋有前史僅存其名晚學實未嘗見其書者則亦無由知其編類之得失是以姑仍其舊而於所錄先儒議論諸書本末則必詳加考訂俾以類相從而不盡仍前史之舊云

右霸史偽史

隋唐志史部皆附在雜史宋志方別立史抄門

宋三朝志二十六部六百一十二卷

宋兩朝志四部一百三十八卷

宋四朝志三部三十三卷

宋中興志四十家四十六部六百八十一卷

右史抄

汲冢周書十卷

鼂氏曰晉太康中汲郡與穆天子傳同得晉孔鼂

注蓋孔子刪采之餘凡七十篇古者天子諸侯皆有史官惟書法信實者行於世秦漢罷黜封建獨天子之史存然史官或怯而阿世貪而曲筆虛美隱惡不足考信則儒學處士必私有記述以伸其志將來賴之以證史官之失其宏益大矣以司馬遷之博聞猶采數家之言以成其言況其下者乎亦有聞見單淺記錄失實胸臆偏私褒貶弗公以誤後世者在觀者慎擇之而已矣

陳氏曰晉太康汲郡發魏安釐王冢所得竹簡書此其一也凡七十篇叙一篇在其末今京口刊本以叙散在諸篇蓋以倣孔安國尚書相傳以為孔子刪書所餘者未必然也文體與古文不類似戰國後人放倣為之者

巽岩李氏曰隋唐經籍藝文志皆稱此書得之晉太康中汲郡魏安釐王冢孔鮒注解或稱十卷或八卷大抵不殊按此則晉以前初未有此也然劉

向班固所錄並著周書七十一篇且謂孔子刪削之餘而司馬遷記武王克殷事蓋與此合豈西漢世已得入中祕其後稍隱學者不道及盜發冢乃幸復出邪篇目比漢但闕一耳必班劉司馬所見者也繫之汲冢失其本矣書多駁辭宜孔子所不取抑戰國處士私相綴緝託周為名孔子亦未必見章句或脫爛難讀更須考求別加是正云

容齋洪氏隨筆曰周書今七十篇殊與尚書體不

相類所載事物亦多過實其克商解云武王先入

適紂所在射之三發而後下車擊之以輕呂

劍名

斬

之以黃鉞縣諸大白商二女既縊又射之三發擊

之以輕呂斬之以元鉞縣諸小白越六日朝至於

周以三首先馘入燎於周廟又用紂於南郊夫武

王之伐紂應天順人不過殺之而已紂既死何至

梟戮俘馘且用之以祭乎其必不然者也又言武

王狩事尤為淫侈至於擒虎二十有二猫二麋五

千二百三十五犀十有三犛七百二十有一熊百
五十一羆百十八豕三百五十有二貉十有八麕
十有六麝五十鹿三千五百有二遂征四方凡慙
國九十有九國馘磨億有十萬七千七百七十有
九其多如是雖注家亦云武王以不殺為仁無緣
所馘如此蓋大言也王會篇皆大會諸侯及四夷
事云唐叔荀叔周公在左太公在右堂下之右唐
公虞公南面立馬堂下之左商公夏公立馬四公

者堯舜禹湯後商夏即祀宋也又言俘商寶玉億
有百萬所紀四夷國名頗古與畜獸亦奇崛以肅
慎為稷慎獫狁人為獫狁人樂浪之夷為良夷姑蔑為
姑妹東甌為且甌渠搜為渠叟高句麗為高夷所
叙穢人前兒若獼猴立行聲似小兒良夷在子
鼈身人首脂其腹矢之藿則鳴揚州禺禺魚人鹿
青邱狐九尾東南夷曰氐乘黃乘黃者似騏背有
兩角東越海蛤海陽盈車大蟹西南戎曰央林以

酋耳酋耳者身若虎豹渠叟以鼪犬鼪犬者露犬
也能飛食虎豹區陽戎以鼪封鼪封者若彘前後
有首蜀人以文翰文翰者若臯雞康民以稭苴其
實如李食之宜子北狄州糜費費其形人身枝踵
自笑笑則上唇翕其目食人都郭亦北狄生生若黃
狗人面能言奇幹亦北狄善芳頭若雄雞佩之令人
不眯正東高夷噉羊噉羊者羊而四角西方之戎
曰獨鹿叩叩距虛犬戎文馬而赤鬣縞身目若黃

金名古皇之乘白州比閭比閭者其華若羽以其
木為車終行不敗篇末引伊尹朝獻商書云湯問
伊尹使為四方獻令伊尹請令正東以魚皮之鞞
魴醬蛟鼈利劍正南以珠璣瑇瑁象齒文犀正西
以丹青白旄江歷珠名龍角正北以橐駝騊駼騊駼
良弓為獻湯曰善凡此皆無所質信姑錄之以貽
博雅者唐太宗時遠方諸國來朝貢者甚衆服裝
詭異顏師古請圖以示後作王會圖蓋取諸此漢

書所引天子不取反受其咎毋為權首將受其咎
以為逸周書此亦無之然則非全書也

後村劉氏曰汲冢書十卷七十篇與藝文志周書
七十一篇合但少一篇鼂子止謂其記錄失實李
仁父謂書多駁詞按中間所載武王征四方馘億
有十萬七千七百七十有九俘三億萬二百三十
暴於秦皇漢武矣狩擒虎二十有二

云云見
前段

紂圍

雖大安得熊羆如是其衆又謂俘商寶玉億有百

萬皆荒唐誇誕不近人情非止於駁而已百篇聖
筆所定孟子猶疑漂杵之語前輩云吾欲忘言觀
道妙六經俱不是全書況汲冢之類乎

吳越春秋十二卷

鼂氏曰後漢趙曄撰吳起太伯盡夫差越起無餘
盡勾踐內吳外越本末咸備

吳越春秋傳十卷

崇文總目唐皇甫遵注初趙曄為吳越春秋十二卷

其後有楊方者以睦所撰為煩又刊削之為五卷遵
乃合二家之書考定而注之

越絕書十五卷

崇文總目子貢撰或曰子胥舊有內紀八外傳十七
今文題闕舛載二十篇又載春申君疑後人竄定世
或傳二十篇者非是

陳氏曰無撰人名氏相傳以為子貢者非也其書
雜記吳越事下及秦漢直至建武二十八年蓋戰

國後人所為而漢人又附益之耳越絕之義曰聖人發一隅辨士宣其辭聖文絕於彼辨士絕於此故曰越絕雖則云然終未可曉也

西京雜記二卷

一作六卷

鼂氏曰晉葛洪撰初序言洪家有劉子駿漢書百卷乃當時欲撰史錄事而未得締思無前後之次雜記而已後學者始甲乙之終癸為十卷以其書校班史殆全取劉書耳所餘二萬言乃抄撮之析

二篇以裨漢書之闕猶存甲乙裒次江左人或以
為吳均依託為之

陳氏曰卷末言洪家有劉子駿書百卷先父傳之
歆欲撰漢書雜錄漢事未及而亡試以此記考校
班固所作殆是全取劉書有少異同耳固所遺不
過二萬餘言今抄出為二卷以裨漢書之闕所謂
先父者歆之於向也而館閣書目以為洪父傳之
非是唐藝文志亦只二卷今六卷者後人分之也

按洪博聞深學江左絕倫著書幾五百卷本傳具載其目不聞有此書而向歆父子亦不聞其嘗作史傳於世使班固有所因述亦不應全沒不著也殆有可疑者豈惟非向歆所傳亦未必洪之作也

東觀漢記十卷

陳氏曰漢謁者僕射劉珍校書郎劉騊駼等撰初班固在顯宗朝嘗撰世祖本紀功臣列傳載記二十八篇至永初中珍騊駼等著作東觀撰集漢記

其後蔡植蔡邕馬日磾等皆嘗補續唐藝文志著錄者一百二十卷今所存者惟吳漢賈復耿弇寇恂馮異祭遵及景丹蓋延八人列傳而已其卷第凡十而闕第七八二卷未知果當時之遺否也

羅鄂州序曰願聞之上蔡任沔文源曰沔家舊有東觀漢記四十三卷丙子渡江亡去後得蜀本錯誤殆不可讀用祕閣本讐校刪著為八篇洎見唐諸儒所引參之以袁宏後漢紀范曄後漢書粗為

全具其疑以待博洽君子按顯宗命班固為蘭臺
令史遷為郎撰光武功臣平林新市公孫述事作
列傳載記二十八篇永寧元年太后又詔劉珍與
劉騶駢作建武以來名臣傳今此記所存皆建武
事豈固及珍騶駢所述邪其文間類前漢書又傳
後所題有太史官曰有序目者此班劉之所為分
也然固與珍傳不載成書卷目隋書經籍志稱劉
珍所撰漢記百四十三卷新舊唐書經籍藝文志

皆百二十七卷吳兢所藏與官書卷同劉知幾所
有僅百十四篇本朝歐陽公嘗欲求於海外後復
散亡今所存纔此耳豈不惜哉然後漢成書自劉
珍謝承薛瑩司馬彪華嶠謝忱袁崧劉義慶蕭子
顯凡九家唯華嶠專述漢記逮范曄總載諸家而
成書亦以華嶠為主後之欲考漢記者於范氏之
書猶有取焉文源之言既然願以為此書乃漢世
史臣親記見聞而袁范出魏晉後以世揆之不得

為此觀高密侯一傳而綱領見矣書雖不全當共存錄因刻板於江夏郡篇中往往有唐武后時字不欲輒改

高氏小史一百二十卷

鼂氏曰唐高峻撰以司馬遷史至陳隋書附以唐實錄纂其要分十例為六十卷後其子迴析而倍之陳氏曰蓋鈔節歷代史也司馬溫公嘗稱其書使學者觀之今按國史志凡一百九卷目錄一卷中

興書目一百二十卷止於文宗今本多十卷直至唐末峻元和中人則其書當止於德順之間迴之所序但云分六十卷為百二十取其便易而已初未嘗有所增加也其止於文宗及唐末者殆皆後人傳益人非高氏本書此書舊有杭本今本用厚紙裝襍夾面寫多錯誤俟求杭本校之

五代新說二卷

鼂氏曰唐張詢古撰以梁陳北齊周隋君臣雜事

分三十門纂次

古史六十卷

鼂氏曰皇朝蘇轍子由撰其序曰太史公始易編
年之法為紀傳世家記五帝以來然不得聖人之
意余因遷之舊始伏羲訖秦始皇為七本紀十六
世家三十七列傳謂之古史追錄聖賢之遺意以
示後世國史譏蘇氏之學皆權謀變詐今觀此書
蓋不然則知子由晚節為學益精深云

朱子古史餘論曰近世之言史者惟此書為近理
其序言古帝王為善不為不善之意非近世論者
所能及而論史遷以為淺近而不學踈略而輕信
亦中其病顧其本末乃有大不相應者其曰帝王
之道以無為宗萬物莫能嬰之此特以老子浮屠
之意論聖人非能知聖人之所以為聖也故其為
言虛空無實而中外首尾不相為用其曰管晏叔
向之流皆不足以知之與孔子知之而有隱孟子

知之而未盡者皆何事邪若但曰以無為宗萬物
莫能嬰之而已則數子之未知也不足恨而孔孟
之所知吾恐其非此之謂也此皆義理之本原而
不可失者秦漢以來史冊之言近理而可觀者莫
如此書而其所未合猶若此豈其學之所從入者
既已未得其正而其所以講摩詠蹈者又有所未
精是以雖既其文而未既其實雖聞其號而未燭
厥理也

蘇氏之學大抵不知義理本原之正而橫邪曲直
惟其意之所欲其父子兄弟平日之言如此者不
可勝舉少公資稟靜厚故此書於一時正見有暫
明者而本原綱領終未能了若長公之志林又不
逮遠矣

陳氏曰其書因馬遷之舊上觀詩書下考春秋及
秦漢雜錄為本紀世家列傳蓋漢世古文經未出
戰國諸子各自著書或增損故事以自信其說遷

一切信之甚者或采世俗相傳之語以易古文舊說故為此史以正之然詆遷為不學淺近則過矣雁湖李氏跋曰士固有夙懷精識自其少年使自超卓至於終身不能以易某觀黃門應制五十篇之文首論夏商周考其年甫踰冠耳而其辭已闕詣如此逮晚謫官續成古史乃系以前論止附益數言豈非理之所到初無老少之異乎

太清記十卷

崇文總目梁王韶撰起太清元年盡六年初侯景破建鄴韶西奔江陵士人多問城內事韶不能人人為說乃疏為一篇問者即示之元帝聞而取讀曰昔王韶之為隆安記言晉末之亂離今亦可以為太清記矣韶因為之然其議論皆謝之矣又韶希帝旨撰述多非實錄

魏典三十卷

崇文總目唐太常少卿元行冲撰起道武帝終宇文

革命凡三十篇孝武入關則書東魏為東帝並載兩國事為凡例微用編年之法文約事詳學者宗之行冲以族出於魏刻意論著引魏明帝時西柳谷瑞石有牛繼馬後之象舊史謂元帝本出牛氏行冲以為非因言道武名犍繼晉受命此其應也特為論載於篇

陳氏曰今本從莆田劉氏借錄卷帙多寡不同歲月首尾不具殆類抄節似非全書

三國典畧二十卷

崇文總目唐汾州司戶參軍邱悅撰以關中鄴都江南為三國起西魏終後周而東包魏北齊南總梁陳凡三十篇今卷第多遺自二十一以下卷闕

南部煙花錄一卷

鼂氏曰唐顏師古撰載隋煬帝時宮中祕事僧志徹得之於官閣筭筆中一名大業拾遺記

大業雜記十卷

鼂氏曰唐杜寶撰起隋仁壽四年煬帝嗣位止越
王侗皇泰三年王世充降唐事

陳氏曰序言貞觀修史未盡實錄故為此書以彌
縫闕漏

大唐新語十三卷

鼂氏曰唐劉肅撰輯故事起武德止大歷分為三
十類肅元和時人

大唐說纂四卷

陳氏曰不著名氏分門類事效世說止有十二門
恐非全書

容齋洪氏隨筆曰藝文志有李繁大唐說纂四卷
今罕得其書予家有之凡所紀事率不過數十字
極為簡要新史大抵採用之其忠節一門曰武后
問石泉令王方慶曰朕夜夢雙陸不勝何也曰蓋
謂宮中無子意者恐有神靈傲夫陛下因陳人心
在唐之意后大悟召廬陵王復儲位新史載其說

通鑑去之似為可惜

景龍文館記八卷

陳氏曰唐修文館學士武甄平一撰記中宗初置學士以後館中雜事及諸學士應制倡和篇什雜文之屬亦頗記中宗君臣宴褻無度以至暴崩其後三卷為諸學士傳今闕二卷平一以字行

唐年小錄八卷

陳氏曰唐戶部尚書扶風馬總會元撰記唐以來

雜事分為七門末卷為雜錄舊有一本畧甚後得
程文簡本傳之始為全書

開元天寶遺事四卷

鼂氏曰漢王仁裕撰仁裕事蜀至翰林學士蜀亡
仁裕至鎬京采撫民言得開元天寶遺事一百五
十九條後分為四卷

容齋洪氏隨筆曰俗間所傳淺妄之書所謂雲仙
散錄開元天寶遺事之屬皆絕可笑遺事託云王

仁裕所著仁裕五代時人雖文章乏氣骨恐不至
此姑析其數端以為笑其一云姚崇開元初作翰
林學士有步輦之召按崇自武后時已為宰相及
開元初三入輔矣其二云郭元振少時美風姿宰
相張嘉貞欲納為壻遂牽紅絲線得第三女果隨
夫貴達按元振為睿宗宰相明皇初年即貶死後
十年嘉貞方作相其三云楊國忠盛時朝之文武
爭附之以求富貴惟張九齡未嘗及門按九齡去

相位十年國忠方得官耳其四云張九齡覽蘇頲
文卷謂為文陣之雄師按頲為相時九齡元未達
也此皆顯顯可言者固鄙淺不足攻然頗能疑誤
後生也惟張彖指楊國忠為冰山事資治通鑑亦
取之不知別有何据近歲興化軍學刊遺事南劍
州學刊散錄皆可毀

明皇雜錄二卷

鼂氏曰唐鄭處晦撰記孝明時雜事別錄一卷題

補闕所載十二事

陳氏曰其書大中九年序處晦大和八年進士也

開元傳信記一卷

鼂氏曰唐鄭棨撰紀開元天寶傳聞之事故曰傳

信

開元昇平源記一卷

陳氏曰唐史官吳兢撰叙姚崇十事

廬陵王傳一卷

陳氏曰唐彭王傳會稽徐浩李海撰叙狄仁傑五
王事

河洛春秋二卷

陳氏曰唐揚州司功包諝撰記安史之亂

右雜史

文獻通考卷一百九十五

欽定四庫全書

文獻通考卷一百九十六

鄱陽馬端臨貴與著

經籍考二十三

史傳記

國史補二卷

鼂氏曰唐李肇撰起開元止長慶間事初劉餗記
元魏迄唐開元事名曰國朝傳記故肇續之

幸蜀記三卷

鼂氏曰唐李匡文宋巨周宋居白撰初匡文記盡孝明崩巨周記止於歸長安叙事互有詳略居白合二記以宋為本析李為注取二序冠篇復掇遺事增廣焉

次柳氏舊聞一卷

鼂氏曰唐李德裕撰上元中史臣柳芳與高力士同竄黔中高力士為芳言開元天寶禁中事乃論

次舊聞李吉甫與芳子冕貞元初俱為尚書郎嘗
道力士之說吉甫每為其子德裕言歲祀既久遺
藁不傳但記十七事後文宗訪力士事於德裕德
裕編次上之多同明皇雜錄

奉天錄四卷

陳氏曰唐趙元一撰起建中四年涇原叛命終興
元元年克復神都

燕南記三卷

陳氏曰唐恒州司戶谷況撰專記成德一鎮事自建中二年至大和七年起張志忠終王承元古語有燕南垂趙北際今以其在燕之南故名然河北諸鎮連叛事迹亦畧矣

建中河朔記六卷

陳氏曰唐李公佐撰序言與從弟正封讀國史至建中貞元之際序述河朔故事未甚詳備以舊聞於老僧智融及谷況燕南記所說略同參錯會要

以補史闕

邠志三卷

陳氏曰唐殿中侍御史凌準宗一撰邠軍即朔方軍也此本從盱江鼃氏借錄其末題曰文忠修唐史求此書不獲今得於忠憲范公之孫伯高其中尚舛誤當訪求正之紹興乙丑鼃公懌

涼公平蔡錄一卷

陳氏曰唐山南東道掌書記鄭澥撰涼國公者李

愬也

開成承詔錄二卷

鼂氏曰唐李石撰石與鄭覃李固言相文宗錄當時延英奏對事開成年號

太和野史三卷

陳氏曰不著名氏但稱大中戊辰陳郡袁濤序自鄭注而下十七人本共為一軸濤分之為三卷

太和摧克記一卷

陳氏曰文與上同而不分卷豈其初本邪

野史甘露記二卷

陳氏曰不著名氏上卷記甘露之禍下卷記諸臣本末

乙卯記一卷

陳氏曰唐布衣李潛用撰末又有吳郡李實者述訓注本謀附益之乙卯太和九年也

兩朝獻替記三卷

鼂氏曰唐李德裕撰德裕相文宗武宗錄當時奏
對議論

元和朋黨錄一卷

鼂氏曰唐馬永易記牛李朋黨始末自牛僧孺試
賢良迄今狐絢去位

陳氏曰池州石埭縣尉維揚馬永易明叟撰自元
和三年牛李對策以至大中十三年令狐絢罷相
唐朋黨本末具矣永易嘗著唐職林實賓錄等書

崇觀政和間人也又有馬永卿大年者從劉元城
游大觀三年進士當是其羣從館閣書以永易為
唐人大誤也

會昌伐叛記一卷

陳氏曰李德裕撰記平澤潞事

四夷朝貢錄十卷

陳氏曰唐給事中渤海高少逸撰會昌中宰相李

德裕以黠戛斯朝貢莫知其國本原詔為此書凡

二百一十國本二十卷合之為十卷

東觀奏記三卷

鼂氏曰唐裴廷裕撰昭宗時長安寇亂相仍自武宗以後日歷起居注散軼不存詔史臣撰宣懿僖三朝實錄廷裕次宣宗錄特采大中以來耳目聞見撰次此書奏記於監修杜讓能以備史閣討論云

陳氏曰記宣宗朝事凡八十九條

貞陵遺事二卷 續一卷

陳氏曰唐中書舍人令狐澄撰吏部侍郎柳玘續之澄所記十七事玘所續十四事

咸通庚寅解圍錄一卷

陳氏曰唐成都少尹張雲景之撰言南詔圍城扞禦事

金鑾密記一卷 一作三卷

鼂氏曰唐韓偓撰偓天復元年為翰林學士從昭

宗西幸朱溫圍岐三年僦因密記其謀議及所聞
見事止於貶濮州司馬予嘗謂僦有君子之道四
焉唐之末南北分朋而忘其君僦崔允門生獨能
棄家從上一也其時搢紳無不交通內外以躡取
爵祿僦獨能力辭相位二也不肯草韋貽範起復
麻三也不肯致拜於朱溫四也詩曰風雨如晦雞
鳴不已僦之謂矣而宋子京薄之奈何一本釐天
復二年三年各為一卷首尾詳略頗不同互相讎

校凡改正千有餘字云

陳氏曰具述在翰苑時事危疑艱險甚矣昭宗屢欲相之卒不果而貶竟終於閩非不幸也不然與崔垂休輩駢首就戮於朱溫之手矣

大唐補記三卷

陳氏曰南唐程匡系撰序言懿宗朝有焦璐者撰年代紀述神堯止宣宗匡系襲撫三百年歷補足十九朝起咸通戊子止癸巳附璐書中乾符已後

備存補記末有後論一篇文詞雖拙議論亦正

南部新書五卷

鼂氏曰皇朝錢希白撰記唐故事

桂苑叢談一卷

鼂氏曰題云馮翊子子休撰雜記唐朝僖昭時雜事當是五代人李邕鄆云姓嚴

中朝故事二卷

鼂氏曰偽唐尉遲偓撰記唐懿昭哀三朝故事故

曰中朝

三朝見聞錄八卷

陳氏曰不知作者起乾符戊戌至天祐末年及莊
宗中興後河東事跡三朝者僖昭莊也其文直述
多鄙俚

廣陵妖亂志三卷

陳氏曰唐晉陽鄭廷誨撰言高駢呂用之畢師鐸
等事

汴水滔天錄一卷

陳氏曰唐左拾遺王振撰言朱溫篡逆事

呂夏卿兵志三卷

鼂氏曰皇朝呂夏卿撰公武得之於宇文時中季蒙題其後云夏卿修唐史別著兵志三篇祕之戒其子弟勿妄傳鮑欽止吏部好藏書苦求得之其子無為太守恭孫偶言及因懇借抄錄於吳興

耳目記二卷

鼂氏曰題云劉氏未詳何時人雜記唐末五代事
朱梁興創遺編二十卷

陳氏曰梁宰相敬翔子振撰自廣明巢賊之亂朱
溫事跡訖於天祐弑逆大書特書不以為愧也其
辭亦鄙俚

莊宗召禍記一卷

陳氏曰後唐中書舍人黃彬撰

入洛記一卷

鼂氏曰蜀王仁裕撰仁裕隨王衍降入洛陽記往返塗中事并其所著詩賦

賈氏備史六卷

陳氏曰漢諫議大夫賈譚撰叙石晉禍亂每事為一詩系之

晉朝陷蕃記四卷

鼂氏曰皇朝范質撰質石晉末在翰林為出帝草降虜表知其事為詳記少主初遷於黃龍府後居

於建州凡十八年而卒按契丹丙午歲入汴順數至甲子歲為十八年實國朝太祖乾德二年也

陳氏曰據莆田鄭氏書目云范質撰本傳不載故館閣書目云不知作者未悉鄭氏何所據也

晉太康平吳記二卷

隋氏曰周吏部尚書張昭撰世宗將討江南昭采晉武平孫皓事迹為書上之

唐餘錄六十卷

鼂氏曰皇朝王皞奉詔撰皞芟五代舊史繁雜之
文采諸家之說倣裴松之體附注之以本朝當承
漢唐之盛五代則閔也故名曰唐餘錄寶元二年
上之溫公修通鑑間亦取之皞曾之弟

陳氏曰是時惟有薛居正五代舊史歐陽修書未
出此書有紀有志有傳又博采諸家小說倣裴松
之三國志注附其下方蓋五代別史也館閣書目
以入雜傳類非是

唐末汎聞錄一卷

鼂氏曰皇朝閩自若纂乾德中王普五代史成自若之父觀之謂自若曰唐末之事皆吾耳目所及與史冊異者多矣因話見聞故事命自若志之

陳氏曰題常山閩自若撰記五代及諸僭偽事其序自言乾德中得於先人及舅氏聞見且曰傳者難驗見者易憑考之史策不若詢之耆舊也然所記亦時有不同者如李濤納命事本謂張彥澤今

乃云謁周高祖未詳孰是

五代補錄五卷

鼂氏曰皇朝陶岳撰祥符壬子以五季史書闕略
因書所聞得一百七事

陳氏曰每代為一卷凡一百七條岳雍熙二年進
士

五代史闕文一卷

鼂氏曰皇朝王禹偁撰錄五代史筆避嫌漏略者

以備闕文凡一十七事

建隆遺事一卷

鼂氏曰皇朝王禹偁記太祖事按太祖崩時趙普已罷為河南節度使盧多遜亦是太宗太平興國元年始除平章事今云上將晏駕前一日召趙盧入宮其謬甚矣世多以其所記為然不足信也

王氏揮麈錄曰建隆遺事世稱王元之所述其間率多誣謗之詞至於稱趙普盧多遜受遺詔昌陵

尤為舛繆案國史韓王以開寶六年八月免相至
太平興國六年九月始再秉衡鈞當太祖升遐時
普正在外何緣前一日與盧丞相同見於寢邪稱
太祖長子德昭為南陽王又誤矣初未嘗有此事
元之當時近臣又秉史筆豈不詳知且載秦王傳
中云云安有淳化三年而見三朝國史秦王傳稱
可謂亂道此特人託名為之又案元之自有小畜
集序及三黜賦與國史本傳俱云淳化二年自知

制誥舍人貶商州至道二年自翰林學士黜守滁
上咸平二年守本官知齊安郡而此序年月次序
悉皆顛錯其偽也明矣

巽岩李氏曰世傳王禹偁所記建隆遺事十三章
考其章句大抵不類禹偁平日之文其七章十三
章鄙悖益可駭幸而史官弗信然學士大夫不習
朝廷之故者猶以禹偁所作私信之余常反復證
驗力排其誣決知其不出於禹偁矣蓋禹偁世所

謂名賢者而數以直道廢故羣不逞輒假借竄寄
謂世可欺殊不知普實愛重禹偁而禹偁於普尤
拳拳也普遺藁四六表狀往往見禹偁集蓋禹偁
代作也彼小人烏得識之

陳氏曰其記陳橋驛前戒誓諸將事元出熙陵而
序文云近取實錄入禁中親自筆削然則此書之
作誠何謂也邵氏聞見錄亦嘗表而出之而或者
亦辨此書之偽當考

祖宗獨斷一卷

陳氏曰皇朝陸經記祖宗獨斷事十事

龍飛日歷一卷

鼂氏曰皇朝趙普撰記顯德七年正月藝祖受禪
事是年改建隆二月普撰此書普時為樞密學士
景命萬年錄一卷 藝祖受禪錄一卷

鼂氏曰未詳撰人記趙氏世次藝祖歷試迄受禪
事

聖宋掇遺一卷

鼂氏曰皇朝歐陽靖撰記國初至仁宗君臣美事

以備史闕

晉公談錄三卷

鼂氏曰皇朝丁謂撰多本朝事每章之首皆稱晉

公言不知何人為潤益初董識志彥得之於洪州

潘延之家延之晉公甥疑延之所為

涑水記聞十卷

鼂氏曰皇朝司馬光撰記賓客所談祖宗朝及當時雜事

陳氏曰此書行於世久矣其間記呂文靖數事呂氏子孫頗以為諱蓋嘗辨之以為非溫公全書而公之曾孫侍郎伋季思遂從而實之上章乞毀板識者以為譏

嘉祐時政記一卷

鼂氏曰吳奎趙鼎歐陽修記立英宗事并賈易論

韓琦定冊疏附於後

甘陵伐叛記一卷

陳氏曰題文升撰不知何人末有論稱甘陵人蘇朔為余言其大父慶歷中陷賊親見賊初叛時事按中興書目有甘陵誅叛錄稱殿中丞王起撰起時為文彥博幕客然則別自一書也

隆平集二十卷

鼂氏曰皇朝曾鞏撰記五朝君臣事蹟其間記事

多誤如以太平御覽與總類兩書之類或疑非鞏書

濮王中陳一卷

鼂氏曰記治平中封濮安懿王時宰相奏狀及臺諫言章

歐陽濮議四卷

鼂氏曰皇朝歐陽修永叔撰其序云武王之作人皆謂君可代濮議之興人皆謂父可絕孟津之會

獨夷齊不食周粟而餓死世未之知也後五百年
得孔子而後顯然則漢議其可與庸人以口舌一
日爭邪熙寧初永叔知亳州日書成上之蘇子瞻
永叔客也亦以臺諫之論為直云

書壬戌事一卷

隋氏曰不知何人作記永樂之敗甚詳

文獻通考卷一百九十六

欽定四庫全書

文獻通考卷一百九十七

鄱陽馬端臨貴與著

經籍考二十四

史傳記

溫公日記一卷

陳氏曰司馬光熙寧在朝所記凡朝廷政事臣僚
差除及前後奏對上所宣諭之語以及聞見雜事

皆記之起熙寧元年正月至三年十月出知永興而止

巽岩李氏曰文正公初與劉道原共議取實錄正史旁采異聞作資治通鑑後紀屬道原早死文正起相元祐後終卒不果成今世所傳記聞及日記并朔記皆後紀之具也自嘉祐以前甲子不詳則號記聞嘉祐以後乃名日記若朔記則書略成編矣始文正子孫藏其書祖廟謹甚黨禍既解乃稍

出之旋經離亂多所亡逸此八九紙草藁或非全幅間用故牘又十數行別書牘背往往剪開黏綴事亦有與正史實錄不同者蓋所見所聞所傳聞之異必兼存以求是此文正長編法也

王氏日錄八十卷

鼂氏曰皇朝王安石介甫撰紹聖間蔡卞合曾布獻於朝添入神宗實錄陳瑩中謂安石既罷相悔其執政日無善狀乃撰此歸過於上掠美於已且

歷詆平生不悅者欲以欺後世於是著尊堯集及
日錄不合神道論等十數書此書起熙寧元年四
月終七年三月再起於八年三月終於九年六月
安石兩執國柄日也然無八年九月以後至九年
四月事蓋安石攻呂惠卿時瑩中謂蔡卞除之安
石罵惠卿之語其事當在此際也

陳氏曰本朝禍亂萌於此書陳瓘所謂尊私史而
壓宗廟者其彊復堅辯足以熒惑主聽鉗制人言

當其垂歿時欲以此書秉畀炎火豈非其心有所
愧悔歟既不克焚流毒遺禍至今為梗悲夫書本
八十卷今止有其半

四明尊堯集一卷

陳氏曰司諫延平陳瓘瑩中撰專辯王安石日錄
之誣僭不孫與配食坐像之為不恭瓘初在諫省
未以安石為非合浦所著尊堯集猶回隱不直末
乃悔之復為此書以謂蔡卞專用日錄以修神宗

實錄薄神考而厚安石尊私史而壓宗廟於是編類其語得六十五條總而論之坐此羈管台州

朱子讀兩陳諫議遺墨跋日錄固為邪說然諸賢攻之亦未得其要領是以言者瀆而聽者疑用力多而見功寡也蓋嘗即其書而考之則凡安石之所以惑亂神祖之聰明而變移其心術使不得遂其大有為之志而反為一世禍敗之原者其隱微深切皆聚此書而其詞鋒筆勢縱橫捭闔煒煜譎

誑又非安石之口不能言非安石之手不能書也
以為蔡卞撰造之言固無是理况其見諸行事深
切著明者又已相為表裏亦不待晚年懟筆有所
增加而後為可罪也然使當時用其垂絕之智舉
而然之則後來載筆之士於其帷幄之間深謀密
計雖欲畢力搜訪極意形容勢必不能得之如此
之悉而傳聞間異詞虛實相半亦不能使人無溢
惡之疑且如勿令上知之語世所共傳終以手筆

不存故使陸佃得為隱諱雖以元祐衆賢之力爭

辯之苦而不能有以正也

此見陸佃供答
史院取問狀

何幸其

徒自為失計出此真蹟以暴其惡於天下便當撫
其肆情反理之實正其迷國誤朝之罪而直以安
石為誅首是乃所謂自然不易之公論不唯可以
訂已往之謬而又足以開後來之惑奈何乃以畏
避嫌疑之故反為迂曲回互之言指為撰造增加
誣偽謗詆之書而欲加刊削以滅其迹乎此書之

作實在建中崇寧之間且其言猶以日錄為蔡卞之所記而其後了翁合浦尊堯之書亦未直攻安石也至於大觀初年而後四明之論始作雖謂天使安石自寫誣悖之心然猶有懟筆增加歸過神考之云則終未免於有所回互避就而失之者也朱子語錄問四明尊堯集曰只似討開却不於道理上理會只於利害上見得於道理全疎如介甫心術隱微處他都不曾改得却只是把持如云謂

太祖濫殺有罪謂真宗矯誣上天皆把持語也龜
山集中有攻日錄數段却好蓋龜山長於攻王氏
曾相手記三卷

鼂氏曰紹聖初元祐黨禍起曾布知公論所在故
對上之語多持兩端又輒增損以著此書云

紹聖甲戌日錄一卷 元符庚辰日錄一卷

陳氏曰丞相南豐曾布子宣撰記在政府奏對施
行及宮禁朝廷事

林氏野史八卷

陳氏曰同知樞密院長樂林希子中撰希不得志於元祐起從章惇甘心下遷西掖草諸賢謫詞者也而此書記熙寧元豐以來事頗平直不類其所為或言此書作元祐之前其後時事既變希亦隨之書藏不毀久而時事復變其孫懋於紹興中始序而行之耳

王氏揮麈錄曰林子中野史世多傳之其間議論

與平日所為極為背馳殊不可曉豈非知公論之不可掩欲蓋其迹於天下後世邪

邵氏辯誣一卷

鼂氏曰邵伯溫撰辯蔡卞章惇邢恕誣罔宣仁欲廢哲宗立徐邸事

邵氏聞見錄二十卷

鼂氏曰邵伯溫子文撰記國朝雜事迄紹興之初序言早以其父之故親接前輩得前言徃行為多

類之成書其父雍也

陳氏曰又有後錄三十卷其子傳所作不專記事
在子錄小說類

傳信錄十卷

鼂氏曰皇朝鮮于綽大受撰言國朝雜事多元豐
後朝廷政事得失人物賢否也

國史後補五卷

陳氏曰蔡條撰條京之愛子京末年事皆出於條

條見攸既叛父亦與條不咸此書大畧為其父自
解而滔天之惡終有不可隱蓋者其間所載宮闈
禁密非臣庶所得知亦非臣庶所宜言既出條筆
事遂傳世殆非人力也

北征紀實二卷

陳氏曰蔡條撰叙伐燕本末歸罪童貫蔡攸亦欲
為京文飾然京罪不可揜也

金人背盟錄七卷 圍城雜記一卷 避戎夜話一卷

金國行程十卷 南歸錄一卷 朝野僉言一卷

鼂氏曰皇朝汪藻編記金人叛契丹迄於宣和乙巳犯京城圍城雜記等五書皆記靖康時事也

陳氏曰朝野僉言不著名氏有序建炎元年八月繫年錄稱夏少曾未詳何人南歸錄直祕閣沈瑄撰亦記燕山事避戎夜話吳興石茂良太初撰

靖康要錄五卷

陳氏曰不知誰撰自欽廟潛邸迄靖康元年十二

月事

靖康傳信錄一卷

陳氏曰丞相李綱伯紀撰丁未二月

靖康奉使錄一卷

陳氏曰鄭望之撰

靖康拾遺錄一卷

陳氏曰何烈撰又名靖康小史又名草史

孤臣泣血錄三卷 拾遺一卷

陳氏曰丁特起撰

裔夷謀夏錄七卷

陳氏曰汪藻撰

陷燕記一卷

陳氏曰賈子莊撰記燕山初陷事子莊不知其名

蔡靖客也

靖康錄一卷 靖康遺錄一卷

陳氏曰錄太學生朱邦基撰遺錄為太學生沈良

撰

金人犯闕記一卷

陳氏曰草茅方冠撰

汴都記一卷 靖康野錄一卷

陳氏曰並不著撰人名氏

悲喜記一卷

陳氏曰圍城中人作書與所親曰中美知府者具述晉亂本末自稱名曰暘皆不知何人也

東都事畧一百五十卷

陳氏曰承議郎知龍州眉山王偁季平撰其書紀傳附錄畧具體但無志耳附錄用五代史例也淳熙中上其書得直秘閣其所紀太簡畧未得為全書

建炎中興記一卷

陳氏曰耿延禧撰

建炎日歷五卷

鼂氏曰宰相汪伯彥撰記太上皇帝登極時事

陳氏曰叙元帥開府至南都踐極

呂忠穆答客問一卷

陳氏曰宰相濟南呂頤浩元直撰

呂忠穆勤王記一卷

陳氏曰左宣教郎臧梓撰記建炎復辟事

渡江遭變錄一卷

丞相上蔡朱勝非藏一撰記苗劉作難至復辟事

建炎復辟記一卷

無名氏

建炎通問錄一卷

宣教郎傅雱撰建炎初李丞相綱所進

北狩聞見錄一卷

幹當龍德宮曹勛功顯撰按曹勛時扈從北狩以
徽廟御札間道走行在所以建炎二年七月至南
京

北狩行錄一卷

蔡條王若冲撰

戊申維揚錄一卷

無名氏

維揚過江錄一卷

尚書左丞葉夢得少蘊撰

已酉航海記一卷

中書舍人李正民撰又名建炎居邠記

建炎假道高麗錄一卷

楊應誠撰取道遼東奉使金朝不達而還

紹興講和錄二卷

無名氏

亂華編三十三卷

知盱眙軍東平劉荀子卿編其前有小序數語云
方石敬瑭割幽燕遺契丹之日孰知為本朝造禍
之原哉逮王安石創新法為辟國之謀又孰知紹

述者名禍之酷哉所集雜史傳記近三十種荀忠肅丞相諸孫也

元祐黨籍列傳譜述一百卷

龔頤正撰以諸臣本傳及誌狀家傳遺事之類集成之其事跡微晦史不可見者則采拾諸書為之補傳凡三百九人其闕者四人而已淳熙中史院取其書以備編輯四朝國史採擇時洪邁奏請乞將龔頤正甄錄授和州文學俟胄用事後賜出身

詳見編年類頤正給事中原之曾孫也

紹興正論二卷

序稱瀟湘野夫不著名氏錄文武官不附和議及忤秦檜得罪者

紹興正論小傳二十卷

宗正寺主簿鄧樓昉暘叔撰以正論中姓名倣元祐黨傳為之

三朝北盟會編二百五十卷

直祕閣清江徐夢莘商老撰輯諸書二百餘家分
上中下上為政宣二十五卷中為靖康七十五卷
下為炎興一百五十卷

北盟集補五十卷

夢莘以前書銓載不盡者五家續編次於中下二
帙以補其闕靖康炎興各為二十五卷

中興十三處戰功錄一卷

參政眉山李壁季章撰中興以來禦寇立功惟此

十三處編為一書所謂司勳藏其貳者也開禧乙丑北事將作其書成

順昌錄一卷

鼂氏曰紹興十年劉錡破女真於順昌城下其徒記其功云

建炎以來朝野雜記甲乙集共四十卷

陳氏曰李心傳撰上自帝系帝德朝政國典下及見聞瑣碎皆錄之蓋南渡以來野史之最詳者

西陲泰定錄九十卷

陳氏曰李心傳撰記吳曦叛逆以及削平本末起嘉泰辛酉迄嘉定辛未為三十七卷其後蜀事益多又增修至辛巳之冬通為九十卷仍頗用太史年表例并記國家大政令防邊大節目首尾二十年

紹運圖一卷

鼂氏曰未詳何人撰自伏羲至皇朝神廟五德之

傳及記事皆著於篇

漢史二十卷

陳氏曰丞相陽羨蔣帝子禮撰其曾祖魏公之奇
穎叔所記遺事殆數百冊兵火散失捃摭遺藁得
六百六十事為十九門淳熙改元書成為之序

國史編年政要四十卷 國朝實錄列傳舉要十二卷

皇朝宰輔拜罷錄一卷 續百官公卿表二十卷

質疑十卷

中興藝文志蔡幼學撰幼學採國史實錄等書為國朝編年政要以擬紀起建隆訖靖康又為國朝實錄列傳以擬傳起國初止神宗朝又為宰輔拜罷錄起建隆盡紹熙年經而官緯之又以司馬光百官公卿表起建隆訖治平乃為續表終紹熙經緯如宰輔圖上方書年記大事下列官詳記除罷遷卒月日而大事止及靖康後未及錄以擬表又為備志以擬志而未成



文獻通考卷一百九十七

欽定四庫全書

文獻通考卷一百九十八

鄱陽馬端臨貴與著

經籍考二十五

史傳記

黃帝內傳一卷

鼂氏曰序云昔錢鏐得之於衡山石室中後至漢
劉向於東觀校書見之遂傳於世藝文志以書之

記國政得失人事美惡其大者類為雜史其餘則屬之小說然其間或論一事若一人者附於雜史小說皆未安故又為傳記類今從之如神仙高僧不附其類而繫於此者亦以其記一事猶列女名士也

陳氏曰誕妄不經方士輩所託也

漢武內傳二卷

鼂氏曰不題撰人記王母降

漢武故事二卷

鼂氏曰世言班固撰唐張柬之書洞冥記後云漢武故事王儉造

飛燕外傳一卷

鼂氏曰伶玄撰茂陵卞理藏之於金縢漆櫃王莽之亂劉棻得之傳於世晉荀勗校上

陳氏曰稱漢河東都尉伶玄子于撰自言與楊雄同時而史無所見或云偽書也然通德擁髻等事

文士多用之而禍水滅火一語司馬公載之通鑑
矣

古列女傳八卷 續列女傳一卷

南豐曾氏序劉向所叙列女傳凡八篇事具漢書
向列傳而隋書及崇文總目皆稱向列女傳十五
篇曹大家注以頌義考之蓋大家所注離其七篇
為十四與頌義凡十五篇而益以陳嬰母及東漢
以來凡十六事非向書本然也蓋向舊書之亡久

矣嘉祐中集賢校理蘇頌始以頌義編次復定其書為八篇與十五篇者並藏於館閣而隋書以頌義為劉歆作與向列傳不合今驗頌義之文蓋向之自叙又藝文志有向列女傳頌圖明非歆作也自唐之亂古書之在者少矣而唐志錄列女傳凡十六家至大家注十五篇者亦無錄然其書今在則古書之或有錄而亡或無錄而在者亦衆矣蓋可惜哉今校讐其八篇及十五篇已定可繕寫初

漢承秦之敝風俗已大壞矣而成帝後宮趙衛之屬尤自放向以謂王政必自內始故列古女善惡所以興亡者以戒天子此向述作之大意也

鼂氏曰漢劉向撰賭趙衛之屬起微賤踰禮制以爲王教由內及外乃采詩書所載賢妃貞女及嬖孽亂亡者序次爲列女傳凡八篇以戒天子前有王回序其畧曰此書有母儀賢明仁智貞慎節義辨通嬖孽等篇而各頌其義圖其狀總爲卒篇傳

如太史公記頌如詩之四言而圖為屏風然世所
行向書乃分傳每篇上下并頌為十五卷其十二
傳無頌三傳同時人五傳其後人通題曰向誤題
其頌曰向子歆誤與漢史不合故崇文總目以陳
嬰母等十六傳為後人所附予以頌考之每篇皆
十五傳耳則凡無頌者宜皆非向所奏書不特自
陳嬰母所斷也頌云畫之屏風而史有頌圖在八
篇中莫得而考以向所序書多散亡獨此幸存而

完復為他手竄疑於其真故并錄其目而以頌證之刪為八篇號古列女傳餘二十傳其文亦典雅可喜故又以時次之別為一篇號續列女傳公武按隋經籍志有劉向列女傳十五卷又有劉歆列女傳頌又有項原列女後傳今回刪此書為八篇以合漢史得之矣至於疑頌非歆作蓋因顏籀之言爾則未必然也二十傳豈項原所作邪

陳氏曰其七篇篇十五人為一百五人第八篇為

頌義隋唐志及崇文總目皆十五卷蓋以七篇分
為上下而自陳嬰母以下十六人附入其中或在
向後者皆好事者所益也王回曾鞏二序辯訂詳
矣鞏之言曰後世自學問之士多徇於物而不安
其守其室家既不見可法故競於邪侈豈獨無相
成之道哉士之苟於自恣顧利冒恥而不知反已
者往往以家自累故也故曰身不行道不行於妻
子況於南鄉天下之主哉愚嘗三復其言而志之

向書傳於世鮮矣惟此書獨全其稱詩采官栢舟
大車之類與今說詩者乖異蓋齊魯韓之學固不
盡與毛氏同也

高士傳十卷

鼂氏曰晉皇甫謐撰纂自隋唐至魏八代二千四
百餘載世士高節者其或以身徇名雖如夷齊兩
龔皆不錄凡九十六人而東漢之士居三之一自
古名節之盛議者獨推焉

陳氏曰序稱自堯至魏咸熙二千四百餘載得九十餘人今自被衣至管寧惟八十七人

襄陽耆舊記五卷

鼂氏曰晉習鑿齒撰前載襄陽人物中載其山川城邑後載其牧守隋經籍志曰耆舊記唐藝文志曰耆舊傳觀其書紀錄叢脞非傳體也名當從經籍志云

談藪二卷

陳氏曰北齊祕書省正字北平陽玠松撰事綜南北時更八代隋開皇中所述

梁四公記一卷

陳氏曰唐張說撰按館閣書目稱梁載言纂唐志作盧說注六一作梁載言邯鄲書目云載言得之臨菑田通又云別本題張說或為盧說今按此書卷末所云田通事跡信然而首題張說不可曉也其所記多妄誕而四公名姓怪異無稽不足深辯

閩川名士傳三卷

鼂氏曰唐黃璞撰錄唐神龍以來閩人知名於世者效楚國先賢傳為之

陳氏曰所記人物自薛令之而下凡五十四人

楊貴妃外傳二卷

鼂氏曰皇朝樂史撰叙唐楊妃事跡迄孝明之崩

綠珠傳一卷

鼂氏曰樂史撰

補江總白猿傳一卷

鼂氏曰不詳何人撰述梁大同末歐陽紇妻為猿所竊後生子詢崇文總目以為唐人惡詢者為之後村劉氏曰歐陽率更貌寢長孫無忌嘲之曰誰令麟閣上畫此一獼猴好事者遂造白猿之說謗及其親

陳氏曰託言江總必無名子所為也

狄梁公家傳三卷

陳氏曰唐海州刺史江都李邕撰

高士外傳一卷

陳氏曰唐大理司直鄭湜撰

鳳池歷二卷

陳氏曰不著名氏記長孫無忌歷官本末及家世
子孫按唐志馮宇鳳池錄五十卷李淑書目惟存
五卷記宰相名次事迹非此書

安祿山事迹三卷

陳氏曰唐華陰尉姚汝能撰

相國鄴侯家傳十卷

鼂氏曰唐亳州刺史李繁撰繁鄴侯泌之子也太和中以罪係獄當死恐先人功業不傳乞廢紙拙筆於獄吏以成傳藁戒其家求世間人潤色之後竟不果宋子京謂其詞浮侈云

陳氏曰按中興書目有柳玘後序今無之繁嘗為通州韓退之送諸葛覺詩所謂鄴侯家多書插架

三萬軸者也其曰行年餘五十出守數以六屢為丞相言雖懇不見錄則韓公於繁亦拳拳矣新舊史本傳稱繁無行漏言裴延齡以誤陽城師事梁肅而烝其室殆非人類然則韓公無乃溢美而所述其父事庸可盡信乎

汾陽王家傳十卷

鼂氏曰唐陳雄撰雄本汾陽王郭子儀僚吏後又從事渾瑊幕府故傳不名第九卷錄行狀第十卷

錄副佐三十三人太將二十七人曰忠武將佐畧
北征雜記一卷

陳氏曰唐宰相趙憬撰貞元四年咸安公主下降
回紇憬副闕播為冊禮使作此書紀行

柳氏序訓一卷

鼂氏曰唐柳玭叙其祖公綽已下内外事跡以訓
其子孫

吳湘事迹錄一卷

晁氏曰唐大中中李紳鎮揚州陷湘湘以罪抵死
後其兄汝納辨訴其枉狀錄總載焉

陵園記一卷

陳氏曰唐宗正丞李

失其名

撰光化元年序

牛羊日歷一卷

陳氏曰唐劉軻撰牛指僧儒羊謂虞卿漢公也

西南備邊錄一卷

陳氏曰唐宰相李德裕文饒撰大和中鎮蜀所作

內州縣城鎮兵食之數大畧具焉

異域歸忠傳二卷

陳氏曰李德裕撰會昌二年嗚沒斯內附德裕奉
詔采秦漢以來由絕域歸中國以名節自著功業
始終者凡三十人為之傳

蠻書十卷

陳氏曰唐安南宣慰使樊綽記南詔事咸通五年
奏之

崔氏日錄一卷

陳氏曰不著名字殘闕無始末未有跋尾亦不知何人言此書出宋敏求家考訂年月及所載人名姓甚詳蓋廣明元年崔沆為相非其子弟即其門人為之字畫清麗而其所記不過蒲飲交通評議有以見唐末風俗之弊云

登科記三十卷

鼂氏曰皇朝樂史撰記進士及諸科登名者起唐

武德訖天祐末

唐制舉科目圖一卷

量氏曰不題撰人凡七十六科任至宰相者七十
二人唯劉蕡名最高而宦最不達

巽岩李氏曰寶元間蔡元翰編集某家有制科登
第錄一卷不著撰人氏字止用年代次序登第者
姓名或不暇遍舉且自敬宗以後闕不復錄而元
翰所記科目以類相從姓名具列又間出其更歷

始終比某家本為優然而尚多脫遺如天授中祝
欽明中英才傑出業輿大經科而此無之蓋元翰
獨據舊唐書故所見有不盡博采別條乃可備一
家言耳

唐登科記十五卷

陳氏曰丞相鄱陽洪适景伯編集按唐藝文志有
崔氏顯慶科記五卷姚康科第錄十六卷李奕登
科記二卷崔氏書有趙儋序而失崔名所載至周

顯德固非崔氏本書而李爽書亦不存洪忠宣得
姚康書五卷於北方而丞相又得別本起武德終
大和於毗陵錢仲氏乃以三本輯為一書而用姚
氏為正三書皆有序姚氏汝諧南仲孫也元和十
五年進士本書錄武德至長慶為十一卷其曰十
六卷者亦後人所續

五代登科記一卷

陳氏曰不著名氏前所謂崔氏書至周顯德止者

殆即此邪館中有此書洪丞相以國初卿相多在
其中故併傳之

燉煌新錄一卷

陳氏曰有序稱天成四年沙州傳舍集而不著名
氏蓋當時奉使者叙張義潮本末及彼土風物甚
詳涼武昭王時有劉炳者著燉煌實錄二十卷故
此號新錄

渚宮故事五卷

陳氏曰後周太子校書郎余知古撰載荆楚事自
鬻熊至唐末本十卷今止晉代闕後五卷

錦里耆舊傳八卷

陳氏曰前應靈縣令平陽句延慶昌裔開寶三年
祕書丞劉蔚知榮州得此傳其詞蕪穢請延慶脩
之改曰成都理亂記天成之後別加編次起咸通
九載迄乾德乙丑迄祥符己酉自平蜀之後朝廷
命令官僚姓名及政事因革以至李順王均劉旻

作亂之迹皆畧載之知新繁縣太常博士張約為之序

平蜀實錄一卷

陳氏曰左藏庫副使康延澤撰平蜀之後延澤以內染院使為鳳州路馬軍都監王全斌等既得罪延澤亦貶唐州團練使按本傳載蜀軍二萬七千人諸將慮其為全師雄內應欲盡殺之延澤請簡老弱疾病七千人釋之餘以兵衛浮江而下諸將

不能用此書敘述甚詳邯鄲書目云不知作者館
閣書目亦然考王元之所撰延澤墓誌知其所為
也

秦王貢奉錄二卷

陳氏曰樞密使吳越錢惟演希聖撰記其父俶貢
獻及錫賚之物

家王故事一卷

陳氏曰錢惟演撰記其父遺事二十二事上之以

送史院

戊申英政錄一卷

陳氏曰婺州刺史錢儼撰記其兄倬事迹倬以戊申正月嗣位

玉堂逢辰錄二卷

陳氏曰錢惟演撰其載祥符八年四月榮王宮火一日二夜所焚屋宇二千餘間左藏內藏香藥諸庫及祕閣史館香聞數十里三館圖籍一時俱盡

大風或飄至汴水之南惟演獻禮賢宅以處諸王
以此觀之唐末五代書籍之僅存者又厄於此火
可為太息也

西李文正公談錄一卷

鼂氏曰西李文正公昉也相太宗其子宗諤錄其
平生所談十七事

陳氏曰所記凡三十七事

張忠定公語錄四卷

鼂氏曰皇朝張忠定公詠守蜀有善政其門人李
旼紀其語論可以垂世者

曹武惠別傳一卷

陳氏曰知石州曹偃撰武惠曾孫也

賈公談錄一卷

陳氏曰序言庚午銜命宋都聞於補闕賈黃中凡
二十六條而不著其名別本題清輝殿學士張洎
蓋洎江南奉使也庚午實開寶三年黃中晉開運

中以七歲為童子關關頭十六歲進士及第第三
人

王沂公筆錄一卷

陳氏曰丞相沂公青社王曾孝先撰記開國以來
雜事凡三十六條

王沂公言行錄一卷

一作三卷

鼂氏曰沂公弟天章閣待制皞錄公平生言行凡
三十七事

陳氏曰前有李清臣序文後有晏殊杜杞岑書

王魏公遺事四卷

鼂氏曰魏公旦相真宗其子素錄事凡五百條

陳氏曰家錄一卷即素所錄遺事也

寇萊公遺事一卷

陳氏曰不知何人作

萊公勲烈一卷

鼂氏曰寇宗奭編宗奭準曾孫也編集仁宗祭準

文及贈誥墓碑傳誌贊詩等為此書

民表錄三卷

鼂氏曰皇朝胡訥撰錄國朝循吏善政李淑以為雖淺俗亦可脩廣記云天聖中脩賢惠錄上之

賢惠錄三卷

鼂氏曰胡訥撰國朝賢惠之女後一卷瑗嗣成之安定先生言行錄二卷

陳氏曰雜錄胡瑗翼之事及告詞誌表祭文等其

間有賢惠錄孝行錄蓋其父訥所為也

韓魏公家傳二卷

鼂氏曰皇朝韓忠彥撰錄其父琦平生行事近世著史者喜采小說以為異聞逸事如李繁錄其父泌崔允記其父慎由事悉鑿空妄言前世謂此等無異莊周鮒魚之辭賈生鵬鳥之對者也而唐書皆取之以亂正史曰是近時多有家傳語錄之類行於世陳瑩中所以發憤而著書謂魏公名德在

人耳目如此豈假門生子姓之間區區自列乎持
史筆其慎焉

陳氏曰不著名氏當是其家所傳也

韓忠獻遺事一卷

陳氏曰羣牧判官錢塘強至幾聖撰至魏公之客
也

文獻通考卷一百九十八